



TALOFA LAVA!

E faatalofa atu i le mamalu o le au faitau uma o lenei lomiga o le Maluapapa, i le suafa o lo tatou Alii o Iesu Keriso. Malo le soifua manuia. E faatalofa atu foi i le paia ma le mamalu o le Ekalesia ua tauaofia i Malua mo lana Fono Tele i lenei tausaga 2015, lau afioga i le Taitaifono ma le Sui Taitaifono faapea le Laulau o le Fono Tele, lau afioga i le Taitaifono ma le paia o le Komiti a le Au Toeaina, le paia i le nofo a Komiti uma a le Ekalesia, faapea le mamalu o Sui Usufono o le Fono Tele, ma le loaloa o le Ekalesia i ona tulaga faalupe.

Ia i le Atua pea le viiga ma le faafetai, ona o lana pule faasoifua ma lona agalelei tele ua tatou aulia mai ai lenei vaitau taua o le tausaga i le tauaofia ai o le Fono Tele a le Ekalesia. E ui ina ua fāi i lagi le folauga a nisi o Tama ma Tina o le Ekalesia i lona tausaga e oo mai i lenei fonotele, ae tatou te faafetaia pea le Atua i lona faaagaina o tatou tagata faatauvaa mo lana feau ma lana galuega faaola i le lalolagi.

O le lomiga muamua lenei o le Maluapapa i lenei tausaga. O se avanoa taua e faailoa ai i le Ekalesia ma le atunuu, nisi o tala o galuega ma polokalame o loo feagai ma faiaoga ma a'oa'o i totonu o le Kolisi. Ua matauina i lenei tausaga nai suiga i le vaaiga i le laumua nei i ona fale ae maise o le Fale Iupeli Lua o loo faasolosolo a'e pea i luga lona fausiaina. Tau ia ina ia faamanuia le Atua i le gasologa o lenei galuega taua.

O le Fono Tele foi lenei ua tofia ai e Tama o le Ekalesia le susuga ia Maafala Lima F.S. ma le faletua ia Lalokava e fai ma Pule o le Kolisi Faafaifeau i Malua. Sagai ane ai o le tai ma ia saga tapenaina ouluta e le Atua i



Susuga Rev. Dr. Afereti Uili F.S.
Pule o le Kolisi

soo se itu, i le tino, i le mafaufau ma le agaga, ma ia faamanuia le Atua i ouluta faiva a manaia. Ia faapea foi ona faamanuia le Atua i le susuga ia Alesana Eteuati F.S. ma le faletua ia Rita i lo ouluta tula'i mai i le tulaga Sui Pule o le Kolisi. Foaiina e le Atua lona tumu atoatoa ia te outou a o alo atu i faiva faata'ita'i i totonu o le Kolisi a le Ekalesia. Malo le galulue, faafetai le tautua i le Atua e ala i tiute ma tofi ua valaauina iai e le Ekalesia. Faafetai i le Kolisi i Malua, i le Aiga faiaoga ma outou faletua, faapea le nofo a su'ega i a'oa'o ma faletua, ona la outou auaunaga i nei tausaga e fia sa tatou galulue ai i totonu o le Kolisi. Malo le onosa'i, malo foi le galulue ma le faamalolosi. Ia faamanuia le Atua i le galuega tele o feagai ma le Pule ma Faiaoga ma Faletua, faamanuia foi le Atua i le soifua tapena o le Aufaigaluega faaolioli a le Ekalesia mo a taeao, i a'oa'o ma o latou faletua.

Avea ia lenei avanoa e momoli atu ai le faamalo ma le faafetai tele i le Ekalesia ona o la outou tatalo e le aunoa mo le Kolisi i Malua nei, faapea foi lo outou lagolagoina o le Kolisi i le tele o itu, ua manuia ai ana polokalame ma

galuega o loo feagai ai. E fia faamaunua foi le faafetai faapitoa i le Komiti o Malua ma le Komiti a le Au Toeaina, o Tamā lava o le Kolisi Faafaifeau i Malua. Malo le faapalepale ma le alofa faatama i le Kolisi, ae maise o lau tatalo aua le manuia o le alo faiva o le Kolisi i ona tiute e pei ona faatonuina ai e le Ekalesia. Malo foi faafetai i le taitaiga o lenei Kolisi i auala uma e manuia ai lona aga'i i luma.

Avea foi lenei avanoa e momoli atu ai se faafetai faalea'ua'u a le Kolisi i le susuga i le Toeaina Faatonu ia Peleti Toese Toailoa o le sa fai ma Taitaifono o le Komiti o Malua ma le Komiti a le Au Toeaina. Malo letauata'i ma le faatoatoa. O lea ua a'e manuia faiva sa feagai ai i le Ekalesia. Faafetai tele i le tofa faale-Atua na e faasoa mai mo le Kolisi, ae maise o le alofa faamaoni sa fai ma ta'iala taua mo i matou. Tau ina ia faamanuia tele le Atua i lau susuga ma le faletua ia Senetenari, i nisi o laasaga fou o le soifuaga o le a aga'i atu iai.

E momoli atu foi le agaga o le faafetai i le Susuga i le Toeaina Faatonu ia Tavita Taulealo, o lē sa galue punoua'i i le Komiti o Malua i tausaga e tele seia oo mai i lenei fonotele. Malo fai o le faiva. Faafetai tele mo le fesoasoani ma le lagolagoina o le Kolisi i nei tausaga uma sa fitaituga ai i le Komiti a Tama o le Ekalesia. Faamanuia tele le Atua i lau Susuga ma le Faletua ia Tumanu, i soo se lavasiga ma soo se tiute o le a feagai ai i le lumana'i.

Tau ia ina ia ta'ita'iina e le Agaga o le Atua le faatofala'iga a le Ekalesia i lana Fono Tele o lenei tausaga, ma ia tatalo pea ma le faatuatua mo le faamagaloina, ma le faamaloloina, ma le faafouina o i tatou e lo tatou Alii.

Manuia le Fono Tele
Soifua
Afereti Uili F.S.
Pule o le Kolisi.

SILASILA I TOTONU

Talofa Lava! - Susuga Rev Dr Afereti Uili	1	Malua Journal & Maota Fou	8
Tautai A'e - Faifeau Malolo Manumalo	2	Faiaoga Fou	9
Faauga o Vaitusi Nofoaiga	3	Faamuli Eseta - Tausga Muamua 2015	10
Faauga Faifeau Samoa 2015	4	Motu le pa ua iloa	11
Bible School - Faauga o le Aoga Tusi Paia	5	Vaiga Eeseese i le Kolisi & Fono Tele 2015	12-13
Soo Aoga Faa-Faifeau 2015	6	Ripoti	14-15
Ripoti Faletusi	7	Taaloga Taga Polo 2015	16

TAUTAI A'E

Faifeau penisione malolo

*Faamalo faafetai le galulue punoua'i ma le onosa'i i le galuega a le Atua i tausaga e tele.
Ia faamanuia le Atua ma puipui i lo outou soifua.*



**Peleti Toailoa FT ma le faletua ia
Senetenari
Ekalesia i Fairfield
Matagaluega Niu SaUelese**



**Tavita Taulealo FT ma le faletua ia
Tumanu
Ekalesia i Papakura
Matagaluega Manukau**



**Avea Vagana FS ma le faletua ia
Saumaleula
Ekalesia i Saleimoa
Matagaluega Malua**



**Esera Palala FS ma le faletua ia
Elisapeta
Ekalesia i Siuniu
Matagaluega Falealili**



**Iatua Mulu FS ma le faletua ia
Fegauiiai
Ekalesia i Ranui
Matagaluega Aukilani**



**Meatuai Fasavalu FS ma le faletua ia
Silivia
Ekalesia i Vailoa Tai
Matagaluega Faleata**



**Titi Eteuati FS ma le faletua ia
Faala'i
Ekalesia i Salelologa
Matagaluega Faasaleleaga**



Afereti Uili ma le faletua ia Samata

Mo'omo'oga alofa ma faamanuiaga mai le Kolisi Faa-Faifeau i
Malua ma le I'uleo o le Maluapapa mo Afereti Uili ma le
faletua ia Samata, ua faamavae mai le tofiga o le Pule o le Ko-
lisi.

Malo le galulue, faafetai tautai.
Ia faamanuia tele le Atua.

MALO LE TAU, MALO LE FINAU!

Susuga i le Faifeau Faiaoga Foma'i, Vaitusi Lealaiauloto Nofoaiga

O le susuga i le faifeau faiaoga ia Vaitusi Lealaiauloto Nofoaiga na auina atu e le Ekalesia mo le faalauteleina o le aoaoina i le Feagaiga Fou i le Iunivesite o Aukilani i le tausaga e 2011. Na faaiuina ma le manuia lea faamoemoe i totonu o le tolu tausaga faaleaoaoga, ma faauuina ai i lona faailoga o le *Doctor of Philosophy* i le aso 30 Setema, 2014.

O Vaitusi ma le faletua ia Mile Nofoaiga ma le nofoalo, e mai le aulotu a Lower Hutt EFKS i Ueligitone, Niu Sila. O Vaitusi e mai alalafaga o Fagamalo Savaii, Tafagamanu Lefaga, ma Vaitele Fou Faleata. O Mile e mai i alalafaga o Afega ma Malie.

O le suesuega a Vaitusi na faia, e faaigoaina o le: *"Towards a Samoan Postcolonial Reading of Discipleship in the Matthean Gospel."* O se suesuega na faatalanoaina ai auala o le faitauina o le Tusi Paia ua masani ai (*traditional methods*). Na tupu a'e ai ni fesili faa-le-tagata faitau o le Tusi Paia mai aso nei. O fesili nei na toe asia ai e Vaitusi nei auala o faitauga ua masani ai, ma faavae mai ai le fausiaina o nisi o auala o le faitauga o le Tusi Paia mai le siosiomaga o tagata faitau i aso nei, mai o latou lava atunuu ma sosaiete i a latou tu ma aga. O lenei suesuega na faaaogaina ai e Vaitusi se tasi o auala o faitauga ua fou mai i lenei vaitau o suesuega o le Tusi Paia, e faaigoaina o le *'Socio-Rhetorical Criticism'* e fai ma taiala o faitauga na ia fafauina mai lona faasinomaga o ia o le Samoa. E faatau e lenei

auala le suesueina pe faapefea ona lalagaina pe mamanuina e le tusitala se tusitusiga mai le gagana ma faasologa o se tusitusiga e atagia ai aga fesootai o tagata i o latou siosiomaga i le taimi o le tala o loo i le tusitusiga, ma le taimi o le tagata na tusia lea tala.

E fia faamauina e le susuga i le foma'i, o lona agaga faafetai tele i le tapuaiga a le Ekalesia Aoao. Faafetai faapitoa i le afioga i le Taitaifono ma le Komiti o Malua, o Tama o le Ekalesia. Faafetai faapitoa i susuga i faafeagaiga ma faletua i Ekalesia EFKS i Aukilani, i lo latou alolofa ma le agaglelei mo la'ua ma le fanau a o iai i le aoga i Aukilani. Faafetai faapitoa i le Pulega a Manukau i Sasae i le susuga i le Toeaina ia Tavita Taulealo ma le faletua, susuga i faafeagaiga ma faletua, ma aulotu. Faafetai faapitoa i le Pulega a Manukau i Sisifo i le susuga i le Toeaina ia Tanielu Mamea ma le faletua, susuga i faafeagaiga ma faletua ma aulotu. Faafetai faapitoa i le susuga i le Toeaina ia Fiatepa Faaee ma le faletua ma le Ekalesia. Faafetai faapitoa foi i le susuga i le Alii Pule ia Afereti Uili ma le aiga faiaoga, ma le Kolisi i Malua mo le tapuaiga. Faafetai faapitoa ia Rev. Professor Otele Perelini mo le faamalosia.

O loo avea nei Vaitusi ma faiaoga o le Feagaiga Fou e le gata i le Kolisi i Malua a e faapea foi le Aoga Tusi Paia a le ekalesia.





Faauuina Tofiga o Faifeau Samoa (FS)

O se fa'amoemoe ua taunu'u i manū, e totogo a'e ai le loto fa'afetai i le Atua. O lagona ia o a'oa'o ma o latou faletua, tainane le tapua'iga mau a aiga, nu'u, nofo a Ekalesia i Samoa nei ma atunu'u mamao, faapea le nofo a fa'afeagaiga i Toeaina ma le aufaigaluega galulue i nu'u ma Ekalesia. E to'aluasefulu ma le lua (22) a'oa'o sa fa'au'uina e avea ai ma Faifeau Samoa (FS) i le Aso To'ona'i na sei mavae atu nei (16 Me, 2015). O le fa'amoemoe ina ia faatinoina sakarameta paia a le Ekalesia EFKS o le Fa'amanatuga ma le Papatissoga. O lenei la'asaga fou ua ausia ina ua ma'ea lo latou soifua auauna i le Ekalesia mo tausaga e lua, ma ua faamaonia mai foi e le Komiti Au Toeaina, lo latou agava'a ai e fa'atino ia sauniga taua a le Ekalesia, a ala i le soifua folafola.

O suafa la nei o faifeau ma faletua ua fa'au'uina mo lea auaunaga taua mo le Ekalesia; Asora Faresa & Nu'uausala (Kuiniselani), Fa'asoi Maua & Taleta (Kuiniselani), Fa'atamali'i Tanielu & Tagi'ilima (Niusaelese), Faitua Tanielu Tua'ena & Tuvalu (A'ana), Feterika Motu & Navy (Fa'asalele'aga), Fotuonu'upule Perelini & Selina (Manukau), Isaia Kalepo & Eseta (Faleata), Kamuta

Mata'afa & Makerita (Malua), Lole Fiso & Kahealani Ta'auso (Niu Sila i Saute), Luteru Ogeuta & Mane (Falealili i Sisifo), Niuetai Auapa'au & Sene-tima (A'ana), Petaia Leavai & Tineiafi (Apia), Peter Gafa Lokeni & Tauvela (Apia), Posala Tiotio & Moveao (Ituotane), Sakaio Maiava & Magalelei (Malua), Sasa Satoa & Tuaefu (Apia i Sasa'e), Se'evae Mulitalo & Rachel (Aukilani), Siatafu Tinai & Trisha (Fa'asalele'aga), Taipisia Lauvi & To'iata (Niu Sila i Saute), Tanoaale'ia Tunupopo & Elalau-mate (Apia i Sasa'e), Tavita Maliko & Mileneta (Kolisi Fa'a-Faife'au Malua), Viliamu Chang Fong & Kathryn (Kolisi Faa-Faifeau Malua).

E to'alua sui o le Kolisi i Malua sa fa'au'uina ai i lea sauniga taua. O le susuga ia **Viliamu Chan Fong ma le faletua ia Kathryn, ma Tavita Maliko ma le faletua ia Mileneta.** O Viliamu o lo'o galue i le Matagaluega o le Feagaiga Tuai (*Old Testament*), a o Tavita Maliko o loo galue i le Matagaluega o le Faiva Alofilima o le Mataupu Silisili (*Practical Theology*). *Malo le onosai, malo le fa'atoatoa i a lua susuga i faifeau faiaoga ma aiga!*



Tavita ma Mileneta



Viliamu ma Kathryn



BIBLE SCHOOL


Fa'an'unga o le Aoga Tusi Paia

E 24 alii ma tamaitai sa tauaaoina a latou tusi pasi i le faauuga a le Aoga Tusi Paia i lenei tausaga, i le aso 14 o Mati, 2015. E 16 i latou sa faamanuiaina i le Certificate of Theology, ma le 15 i le Diploma of Theology, e aofia ai ma le toa 7 sa faauuina i faailoga uma ia e lua. O nisi o i latou sa faauuina i lenei tausaga e aofia ai a'oa'o fesoasoani, o sui mamalu o le Palemene, o faauluuluga o Matagaluega a le malo, o tiakono faapea faletua o tiakono ma faletua o a'oa'o Malua. Na molimauina le lagona faaga'e'etia ma le faafetai i le Atua, mai le au-faa'u'u, faapea le loaloa o le Ekalesia, o aiga ma uo ma e masani, sa potopoto ai i lea aso mo lenei faamoemoe taua.

O le sauniga o le faauuga sa taitaiina e le afioga i le Taitaifono o le Komiti a le Au Toeaina ma le Komiti a Malua, le susuga ia Peleti Toese Toailoa (FT). Sa lagolagosua i ai le Failautusi o le Komiti a le Au Toeaina, ia Kerisiano Soti (FT) faapea le Pule o le Kolisi, ia Afereti Uili (FS). O le Sui Pule o le Kolisi ia Maafala Limā (FS) sa tolaulauina suafa o i latou sa faauu, ona tauaaoina atu lea o a latou tusi pasi e le susuga ia Peleti. O le afioga ia Galumalemana Lakisa Toelupe sa fai ma sui o le au faauu e faafetaia Tama o le Ekalesia, le Pule ma le Kolisi i Malua, tainane o aiga, o uo ma e ua masani. O le lu'i a Galumalemana mo le Ekalesia, ina ia vave mai se taimi i le lumanai, e talia ma avea ai tina e fai ma faifeau o le EFKS.

Ia faamanuia le Atua i le au faauu o le 2015 i tiute ma faiva, ae maise i latou o loo faaauau pea i le Aoga Tusi Paia ma nisi o faamoemoe e faaagaina lenei avanoa taua, e faalautele ai le silafia i afioga paia a le Atua.





O le Aso 24 o Mati, 2015, na fa'ataunu'uina ai le mafutaga soofaatasi a Kolisi Faafaifeau e aofia ai Malua, Piula, Moamoa, ma le Ekalesia Nasareta. O lea mafutaga sa faia i le laumua i Piula ma o se faamoemoe lava na liuliu i ai se tofa i susuga i Alii Pule, ia Rev. Dr. Afereti Uili (Malua) ma Rev. Dr. Mosese Mailo (Piula), ina ia toe faaaauau lenei mafutaga ona ua silia ma le tolu tausaga talu ona tuua.

E le'i mafai ona auai uma sui o Moamoa ma Nasareta vagana Alii Pule na nai sui filifilia, ae na masii atoa le Kolisi i Malua ona o lenei faamoemoe taua. E fa pasii faatasi ai ma taavale a faiaoga sa faaoga mo le feaveaina o le Kolisi ma sa tuua Maluapapa i le 6:00 a.m. ae toe taliu mai i le 7:30 p.m o le aso lava e tasi.

Na amata lava le mafutaga i le sauniga lotu sa ta'ita'ia e B.D. Students mai Piula ona tatala aloaia ai lea o le mafutaga i le saunoaga autū o le aso sa fofogaina e le lauga aami, le susuga i le alii Polofesa ia Rev. Otele Perelini ma sa faamamafaina lava le taua ma le aoga o nei mafutaga e ala i le ola fesootai ma le non-ofo fealofani o le aufaigaluega a le Atua, ae maise foi le taua o le “Ola mo Isi” (*Live for Others*), e pei o le manulauti o le mafutaga o lenei tausaga.

Sa vaevaeina lava Kolisi Faafaifeau i vaega e fa (Mataio, Mareko, Luka, ma Ioane) mo taaloga. O loo tele pea taleni sa matauina i aoao ma faletua, ae e manaomia foi se telē o se galuega e fia faia mo le faaitiitia o le mamafa o nisi o faletua. Sa matauina foi le saunia lelei o faaevagelia a vasega tuufaatasi e ui ina sa utiuti se taimi sa tapena ai. Felanulanuai laufofoga fiafia o le au mafuta ona o le tele o suaga fiafia, ae maise o le mamafa o taumafa ma le malū o le vai taele i Piula.

Sa mafuli lava finagalo o Alii Pule ma le mamalu o aiga faiaoga o Kolisi na auai ina ia faaaauau pea nei mafutaga i tausaga ta'itasi. Na faaiu le mafutaga i le sauniga lotu sa ta'ita'ina e le Vasega Faaiuso mai le Kolisi o Malua ma saunoaga faaiu a Rev. Dr. Afereti Uili. Lulu aao ma faatofa ma taape ai ma le fiafia fanau a le Atua. E lei faamautūina se aso ma se nofoaga mo le mafutaga o le 2016, *but we will see you there*.

Viliamu Chan Foun (sui o le komiti).



RIPOTI o le FALETUSI

O le aso 28 Aperila 2015 sa taunuu mai ai mai le kamupani o Maxkar, se *photocopier* fou o le Sharp Digital Copier M365. O lenei *photocopier* e lua a'i *photocopier* o le faletusi, e sui i le isi *photocopier* ua faaletonu. O le tau o lenei masini e \$17,450.00 Tala. O lenei tau sa faatupeina e le Komiti o Malua Tuai (SMT). O le Sharp M365 e fa *functions*. E le gata ona lomia ma fai ai kopi, e mafai foi ona *scan* tusi ma faavasega *copies*. E mafai ona *scan* ata lanu ma ave sao i le USB *stick*. E 36 kopi e mafai ona fai i le minute, ae 48,000 *copies* e faia i lenei masini, ona faatoa toe sui lea o le *toner*. E momoli atu le agaga fa'afetai i le Komiti o SMT ma le Pule o le Kolisi, ia Afereti Uili mo le fesoasoani tele mo le faletusi o Malua.



O le aso 12 o Mati na taunuu mai e-kopi mai le Australia National University (ANU, Canberra), o BD ma BTh *Thesis* o a'oa'o Malua mai tausaga 1997-2012. O nei e-kopi sa faatinoina e le Pacific Manuscripts Bureau o le faletusi o le ANU, Australia. E 59 *thesis* sa maua e-kopi. Sa faaopoopo foi i ai ma *thesis* a susuga i faiaoga ia Vaitusi Nofoaiga (PhD) ma Visesio Saga (MTh).

O lenei kuata (Fepuari – Aperila), e 145 tusi fou sa faaopoopoina i le tatou faletusi, mai Matagaluega taitasi o le Kolisi. Ua iai foi suiga i le faaaogaina o le tatou faletusi i le po. Ua avanoa le faletusi mo tausaga taitasi e faaoga ai le faletusi i le po, mai le 8-10pm, Aso Gafua e oo le Aso Tofi. Ae avea ia lenei avanoa e momoli atu ai le agaga fa'afetai mo latou uma ua fesoasoani mai mo le atinaeina o le faletusi. E fa'afetai faapitoa i le susuga i le Alii Pule, ia Afereti Uili mo nei suiga lelei mo le lumani o le faletusi o Malua.



MALUA JOURNAL

O le lomiga lona tolu lenei o le Malua Journal. O lenei tusi, sa amata lomia i le tausaga 2013 ma o tusi-tusiga ma suesuega a faiaoga Malua, i mataupu tau i le Tusi Paia. E sefulu *articles* i lenei lomiga mo lenei tausaga, tolu *articles* mai le Matagaluega o le Mataupu Silisili, lua mai le Matagaluega o le Feagaiga Tuai, Feagaiga Fou, ma le Faiva Alofilima o le Mataupu Silisili (*Practical Theology*). Tasi mai le Matagaluega o le Tala Fa'asolopito o le Ekalesia. O nisi nei o suesuega a faiaoga o loo faamauina i lenei lomiga:

Faiva Alofilima o le Mataupu Silisili :

“Ua ‘ai ‘Ulu Tuana’i Ta’si: O le Soga’imiti: O La’ei o le Tapua’iga i le Atua.” by Tavita Maliko

“Tofa Fetu’utu’una’i: Meaalofa mai le Atua.” by Reupena Maulolo.

Feagaiga Tuai:

“Aisea ua tuai mai ai Samuelu? 1 Samuelu 13: 8-14” by Malutafa Leau-pepe

“O Finauga o Malosi i le Fa’ato’ilaloina o Ieriko.” by Viliamu C. Fount.

Feagaiga Fou:

“An Interpretation of Discipleship in Matthew 4:12-25”. by Vaitusi No-foa’iga.

“Ou te loto i le Alofa, ae le o le Taulaga. Mataio 9:9-13 ma le 12:1-8. Fai-tauga faa-soifuaga masani mai le tagata lotu EFKS.” by Visiesio Saga

Mataupu Silisili:

“Mataupu Silisili mo Tagata Nu’u Ese-Diasporic Theology.” by Peletisala Lima

“O le Fa’ato’aga o le Loto: O Iesu ma le AlafauTaumatau, Ofu Tele ma Maila e Tasi (Mataio 5:39-41).” by Olive Samuelu



Maota Fou ma le Fale Iupeli



Pulega Manukau Sisifo



Aulotu Tutuila



Pulega Vitoria Tutotonu



Pulega Melepone Matu



Pulega Malua Sasae



Le Iupeli Fou

FAIAOGA FOU

Na amataina lava galuega a le Kolisi Fa'a-Faifeau i Malua i lenei tausaga i se sauniga e taliaina aloaia ai faiaoga (induction) fou e to'atolu mo le galuega faa-faiaoga. O faiaoga fou la ua amataina le auaunaga faa-faiaoga i lenei tausaga, e ala i le finagalo o le Komiti o Malua e aofia ai i latou nei.

Taipisia ma Ramona



O le susuga i le faifeau faiaoga foma'i ia Taipisia Leilua ma le faletua ia Ramona ua toe fa'aauauina le soifua fa'afaiaoga i le Kolisi i Malua i lenei tausaga. O le susuga i le foma'i o lo'o galue nei i le Matagaluega o le Mataupu Silisili (*Theology*).

Brian ma Tanaria



O le susuga ia Brian Kolia ma le faletua ia Tanaria sa fa'ai'uina le taumafai i le Kolisi i Malua i le 2012 i le fa'ailoga o le *Bachelor of Divinity*. O le tausaga na tea nei 2014 na fa'au'uina ai i le fa'ailoga o le *Masters of Theology* mai le Kolisi Fa'a-Faifeau a le Pasefika i Suva, Fiti. O lo'o ua tautua nei i le Matagaluega o le Feagaiga Tuai (*Old Testament*).

Panama ma Herema



O le susuga ia Panama Hector Pouono ma le faletua ia Herema sa fa'ai'uina le taumafai mai le Kolisi i Malua i le 2012 i le faailoga o le *Bachelor of Theology*. O le tausaga talu ai 2014 sa toe talia mai ai i fanua ma lona fa'ailoga o le *Masters in Theology (Distinction)* mai le Kolisi Fa'a-Faifeau a le Pasefika i Suva, Fiti. O lo'o galue nei i le Matagaluega o le Tala Fa'asolopito o le Ekalesia (*Church History*).

Faifeau Faiaoga ua toe talia mai

O le amataga foi o le tausaga nei na toe talia mai ai i le laumua i Malua susuga i faifeau faiaoga o **Vaitusi Nofoga ma le faletua ia Mile**, fa'apea **Latu Latai ma le faletua ia Lotu**, ina ua maea aoaoga sa feagai ai i atunu'u mamao mo le faailoga o le Dr of Philosophy. O lo'o ua galulue nei mo le galuega faa-faiaoga i le Kolisi i Malua. E faafetaia ai pea le alofa o le Atua ona ua taunu'u manuia mai i fanua le taumafaiga. *Malo le tau, malo le onosa'i a'o fegai ai ma le soifua a'otauina!*



Vaitusi ma Mile



Latu ma Lotu

FAAMULI O LE ESETA

Tausaga Muamua 2015

O se tala puupuu lenei o le fa'amuli a le Tausaga Muamua 2015 mo aso mālōlō o le Eseta 2015. O le itūlā e 2pm i le Aso Tofi, 2 Aperila 2015, na potopoto ai le vasega mo le amataina o tapenaga o le fa'amuli. Na saunoa fa'afetai Solipo ma fa'amālamalama vāega uma o polokalame mo lenei faamuli. O le susuga i le Pule o le Kolisi, Afereti Uili ma le faletua ia Samata sa taitai i le fa'amulī, faatasi ai ma le lagolagosua ia Solipo Niulesa ma le faletua ia Lile. O le aofa'i o a'oa'o ma o latou faletua sa fa'amuli e 24. A'oa'o nofo to'atasi e 8, o le aofaiga e 32.

O le itu sa faatauaina tele ma ave iai le fa'amamafa, o le leoina lea o le aai ma le vaaiga o meatōtino uma a le Kolisi ina ia sāogālēmū mea uma E faapea foi i mea fafaga i tuamaota o le aai, i manu papālagi ma mea tuā'olō. Sa vāevaeina aoao e 20 mo faia'oga uma e fesoasoani i le gasecina o tāmufa ma nisi feau i afiafi e pei ona masani ai le Kolisi i tiute fa'a-kuka-tumau. A maea ona pōtopoto lea i le faleai mo le faiga lotu ma le taumafataga o le afiafi, ae maise foi o tapenaga mo le isi aso e sōso'o ai.

O tapenaga uma o lenei fa'amuli na saunia lava e le vasega, faatasi ai ma isi vaega sa tuufo mai e a'oa'o taitasi mo le fa'aleleia atili o tausiga o le fa'amuli. Na saunia e le fa'amuli se toonai i le Aso Sā o le Toetu. Na māfuta ma faitoonai faatasi ai le vasega o le tausaga muamua ma faia'oga. Na tapenaina lelei foi e le vasega vi'iga mo faigalotu o le Aso Faraile (*Easter Friday*) ma le Aso Sā o le Toetu.

AOTELEGA

E moni lava upu a Tavita: "Se mea ina a lelei ma le mātagōfie lava pe a nonofo faatasi o uso". Ua fa'amaonia lelei upu o lea fātuga, ina ua māfuta faatasi ai le Tausaga Muamua i la matou faamuli. Aua sa molimauiina lava le galulue faatasi, talitaliē ma fetufa'ai i gāluega ma tiute sa fa'atinoina. O ia galuega ua totōina ai le fiafia ma le alofa faauso, e fa'atupuina le ola fealofani ma le fe'oe'oea'i o lenei vasega.

O la mātou tatalo, ia fa'amanuia pea le Atua i le Kolisi aua faiva ma nafa tofia, e faapea foi i ona Ta'i-ta'i ma le vasega o faia'oga ina ia maua pea ni soo moni e galulue i lana feau mo taeao ma le lumana'i. Soifua ma ia manuia.

Leuelu Setu - (*Failautusi, Mo le Vasega Tausaga Muamua 2015*)

A'oa'o ma faletua o le Tausaga Muamua 2015

Students

Aneteria Ulutui
Arnold Fautanu
Atapana Lau
Bismarck Tamati *BBus*
Charlie Banse
Elekana Leali'ifano
Esara Esara
Fa'alefu Tumutalie
Fa'auli Maiava
Fau'ena Leilua
Fiso Lakisa
Harry Cowley
Keresoma Seuala *BCA*
Leuelu Setu *BSc*
Oli Levi
Onosa'i Nofoa'iga
Pēia Lesatele
Pelema Taulapapa
Sunita Nua
Tau Toleafoa *BMus, Hons.*

Wives

Roselyn
Lelani *LLB*
Malaē
Pauline
Veronica
Leaoa *BEd*
Felicity
Vi'i
Panorama
Alo'ese
Eseta
Tuano'a *BBus*



TUSI MO LE SUEGA ULUFALE I MALUA 2015

**Feagaiga Tuai: Ieremia
Feagaiga Fou: Roma**



IA MOTU LE PA A UA ILOA...


Fa'aipoipoga a le Kolisi:

I le tu'uaga umi a le Kolisi 2014-2015, sa faapena ona fa'apaiaina ai nisi o a'oa'o ma o latou faletua e ala i fa'aipoipoga. O le susuga i le a'oa'o fa'ai'uaso ia Auatama & Sunema Iese (24 Ianuari 2015), faapea ai ma le a'oa'o tausaga lua ia Pa'o & Florence Pele (20 Tesema 2014). *Fa'amanuia le Atua i o lua aiga fou ma ia fa'avae i le alofa.*

Auatama & Sunema Iese



Pa'o & Florence Pele



Pepe Fou:

Ua fa'aopoopoina foi le faitau aofa'i o le Kolisi i lenei tausaga e ala i meaalofo taua pei ona fa'amanuiaina ai nisi o a'oa'o ma faletua i pepe fou. O le fiafiaga foi lea i lenei a'ai ona o lo'o alofagia pea e le Atua e ala i ana oloa taua, ua tu'uina mai e tausia ma a'oa'oina lelei mo se manuia o aiga, nu'u, ae maise le Ekalesia.

Faifeau tausia nu'u:

O le susuga i le faiaoga ia Semikueva Fa'atoafe ma le faletua ia Vesia ua vala'auina nei e le Ekalesia EFKS i Moata'a e avea ma o latou faifeau. E vala'auina le susuga ia Semikueva o lo'o galue fa'a-faiaoga i le Aoga Tusi Paia a Malua. E to'afa o la alo ma ua fa'amoemoe e osia la latou feagaiga i le amataga o Iulai i le tausaga nei lava. *Ia manuia tele le alo atu o lau susuga ma le faletua mo lea faamoemoe taua!*

Vasega mo faletua:

O le tausaga ua tuana'i 2014 na toe amataina ai vasega mo a'oa'oga i le Mataupu Silisili ma le Tusi Paia mo faletua o a'oa'o o le Kolisi. Lea lava ua fa'aauauina pea i lenei foi tausaga, ma ua matauina ai le fiafia ma le naunau o faletua i a latou vasega. E momoli ai le fa'afetai i le Pule o le Kolisi ia Afereti Uili fa'apea le lagolago malosi a le aiga faiaoga ua mafai ai ona tino mai lenei fa'amoemoe taua. *Ia fai lea ma vi'iga sili o le Atua!*

Galuega puipuia mo le soifua maloloina:

O taumafaiga lava ina ia puipuia le soifua maloloina o le Kolisi nei, sa faatinoina ai foi i lenei tausaga le fagaina (*spraying*) o le nuu atoa, ina ia puipuia ai mai faamai e feaveai e lenei manu faalafu'a o le namu. E momoli ai le faafetai tele i le Ofisa o le Soifua Maloloina mo lenei auaunaga, e auala atu lea i le faletua ia Mau Tuia. Talosia ia faaaau ai lea faamoemoe taua.

Suiga fou i le taitaiga o le Kolisi:

Ina ua talia e le Komiti o Malua ma le Komiti a le Au Toeaina le faamavaega a le Alii Pule ia Afereti Uili mai le tofiga o le Pule o le Kolisi, o lea ua filifilia ai nei le susuga ia Maafala Limā mo le tofiga o le Pule, a o le susuga ia Alesana Eteuati ua se'ei mai nei i le tofiga o le Sui Pule. O moomooga alofa ma faamanuiaga mo tofiga ua tofia i ai, ia faamanuia le Atua. Ia faamanuia foi le Atua ia Afereti Uili ma le faletua ia Samata ma le nofoalo, i tiute o le a faaagaina i ai le soifua. O le sini faapitoa lea o le lomiga o le Malua-papa ia Novema 2015.

Vaaiga i le Kolisi



Vaaiga i le Fono Tele



MAFUTAGA A'OA'O

I le suafa mamalu o Iesu Keriso le Ao o le Ekalesia, e faatalofa atu ai i le paia ma le mamalu o le Ekalesia i Samoa nei ma atunuu i fafo. O le ripoti pu'upu'u o le mafutaga a a'oa'o. E toafasefulu ma le tasi (41) a'oa'o faiaiga, ae toaluasefulu ma le fa (24) a'oa'o nofo to'atasi. E toalua a'oa'o sikolasipi mai le Ekalesia Kiripati o lo o i le tausaga fa; o Keebwa Tira ma Tieem Metari. O lo o manuia le mafutaga a a'oa'o ma faletua, ma le gasologa o aoaoga i lenei tausaga, i le tino, le mafaufau ma le agaga. O vaega eseese uma ia mo le tapenaina o a'oa'o aua le galuega o fa'atali mai. E fa'aleoina ai le fa'afetai i le Pule ia Afereti Uili ma le faletua ia Samata, mo fautuaga ma tima'iga aua se manuia o polokalame a a'oa'o i lenei kuata ua fa'aiuina. E fa'afetaia foi le Sui-Pule ia Ma'afala Limā, faapea le aiga faiaoga ma faletua, mo le fa'amalosi'au ma le fa'alototele i a'oa'o ma faletua. E momoli foi le fa'afetai i a'oa'o ma faletua.

Malo le galulue ma le tautua i le Kolisi ma ana polokalame uma. Ia fai ma vi'iga o le Atua la tatou auaunaga. O le fa'afetai faapitoa mo matua ma aiga, nu'u ma Ekalesia pele, i le tapuaiga faifai pea a'o matou i ai i le Laumua i Malua. Fa'afetai le tatalo, fa'afetai alofa. O lo o sisila pea le lagi i lo outou agalelei.

Ia manuia tele le Fonotele a le Ekalesia i lenei tausaga 2015.

Peniamina Neueli.

(Peresetene: Mafutaga a A'oa'o ma Faletua.)

MAFUTAGA FALETUA



Talofa lava. O le ripoti lenei mo le mafutaga a faletua o a'oa'o mo lenei kuata. E toafasefulu ma le tasi (41) le aofai o faletua. E lima vaega ua vaevaeina i ai le mafutaga i kuata taitasi e galulue ai, o le vaega mo le Falesa (*Church Group*), o le vaega mo A'oga Amata (*Kindy Group*), o le vaega e tausia le Fale Mafutaga (*Hall Group*), o le vaega e fesoasoani i le Faletusi a le Kolisi (*Library Group*) ma le vaega a le Home Group. Ua amata vasega mo faletua lava ia i mataupu eseese, ina ia tapenaina atili ai mo le galuega. O lo o fa'aaauina foi polokalame o le faia o meataulima ma le kukaina o mea taumafa i aso Lua o vaiaso taitasi. Sa faia le fa'aaliga o meataulima i le aso Lua, Aperila, 2015. O lo o fa'aaauina pea sauniga lotu a faletua i afiafi o aso Lulu o vaiaso taitasi. O faletua o faiaoga ma faletua o a'oa'o fa'aiuas o ta'ita'ia nei sauniga. O aso Tofi o le aso ta'aalo lea o le Kolisi, ma e faia ai foi taaloga a le mafutaga a faletua. O le voli polo lava le taaloga e fai, ma o se

polokalame taua e faamalosi ai le tino mo le soifua maloloina lelei.

E fa'aleoina ai le fa'afetai i le faletua o le Pule, Samata Uili, o le ta'ita'i foi o le mafutaga a faletua, mo fautuaga ma apoapoaiga. Momoli foi le faafetai i le faletua o le Sui Pule, Lalokava Limā ma faletua uma o faiaoga, mo le lagolagoina o polokalame uma a le mafutaga. E faafetai foi i faletua o vasega ta'itasi mo le lagolago mai. Malo le onosa'i ma le fa'amalolosi i vaega uma o la tatou mafutaga.

Ia fa'amanuia le Atua ina ia sologa lelei ai fua-fuaga ma fa'amoemoega uma o lenei tausaga.

Faafetai, Nyrelle. P. Neueli. & Niukini. V. Tua.



TAALOGA MAFUTAGA A'OA'O

E tolu taaloga masani sa tausinio ai au e lua o le mafutaga a aoao mo lenei kuata; o le *touch rugby*, *soccer*, ma le kirikiti Samoa. E lima vaiaso sa feagai ai ma le *soccer* ma le *touch*. O le iuga o nei taaloga, e tolu vaiaso o manumalo pea le *White*, a e lua vaiaso mo le *Black*. Ua faatumauiina ai nei le siamupini i le *White* mo lenei kuata, e ui i le malosi mai o le finau o le au a le *Black*.

I le kirikiti Samoa, e fa au masani sa vaevaeina ai, i vaiaso e tolu sa faatinoina ai lea fa'agatama. O le *Red* sa i ai le talita i le tausaga 2014, a e sa se'ia e le *Yellow* i le taaloga muamua. E lua vaiaso sa umia ai e le *Yellow* le talita, peitai o le vaiaso mulimuli o kirikiti sa se'iina ai loa e le *Blue* i se taaloga finau tele. Ua mau ai nei i le *Blue* le talita mo lenei kuata. O le faatulagaina la o au kirikiti i le maea ai o vaiaso e tolu; *Blue* (1st), *Green & Yellow* (2nd equal), ma le

Red (3rd).

Faafetai faapitoa i paaga masani, i susuga i faafeagaiga ma nisi o le ekalesia o loo faama-opoopo mai pea i taaloga a le Kolisi, aua se faamalositino i Aso Tofi o vaiaso ta'itasi. Ma le faaaloalo tele,

Komiti o taaloga.

Faiaoga

Peletisala Limā (Ta'ita'i Komiti)

Solipo Niulesa (Sui Taitai Komiti)

A'oa'o

Iopu Kalepo

Motusaga Lesa

Auatama Iese

Kara S. Ipinui

AOGA ASO SA I MALUA

O le ripoti a le Aoga Aso Sa i Malua i le amataga o lenei tausaga, 2015. O loo tumau pea le taimi o le Aoga Aso Sa, mai le 7:30 – 8:30 i le taeao, i Aso Sa taitasi. O le itula e tasi (1:00pm) o Aso Toonai uma, o le taimi lea mo faiaoga e faataitai ai a latou mataupu mo vasega taitasi. O taeao o Aso Toonai taitasi mai le 7.00-10.00 i le taeao, e faia ai taaloga mo le fanau, pe a talafeagai ma le tau.

E 20 faiaoga Aso Sa sa tofia mo lenei kuata, e i ai a'oa'o faaiuas, o faletua o a'oa'o faaiuas, faapea ma nisi o faletua o faiaoga, e fesoasoani i le faatinoina o le galuega. Avea ia le I'uleo o le Maluapapa

e momoli atu ai le faafetai tele i le galuega fita sa feagai ma outou susuga i faiaoga Aso Sa o lenei kuata. Ia faamanuia le Atua i tofi o feagai ai ae maise i lo outou soifua a'otauina.

O le upu moni, e poto le tautai ae se lava lana atu i le ama. O a ni faaletonu o le auauna faatauavaa, ia faamagalo mai. A o ni galuega lelei uma na faatinoina ia fai lea ma viiga o le Atua. Ia soifua ma ia manuia.

Faafetai, Piula Pula.

Failautusi

MALUAPAPA PRE-SCHOOL



Na tatalaina faitotoa ole aoga faata'ita'i a Malua i le vaiaso mulimuli o le masina o Fepuari, 2015. O mataupu o loo a'oa'oina ai le fanau, e aofia ai le faamasani i lo latou siosiomaga, o le ola maloloina ma isi vaega eseese o lo latou ola tuputupu a'e e ala i pese, tala, taaloga ma galuega faatino eseese. O le sini o nei a'oa'oga uma ina ia maua e i latou le fiafia ma toaga ai lava i le aoga. E taitaia lenei aoga e le faletua ia Samata Uili, faatasi ai ma le lagolagosua o faletua o faiaoga ia Lotu Latai, Mile Nofoaiga, Tenaria Kolia ma Herema Pouono. O faletua o a'oa'o sa galulue i lenei kuata ua tuanai atu, o Pauline, Veronika, Leaoa, Uatifoti, Vaituutuu, Malua, Sunema ma a'u nei, e tapena lesa i vaiaso taitasi. Sa mafai ona faafesoa'i taleni ma agavaa e lē gata i le tapenaina o mataupu, a o le fesoasoani foi i faletua e faamasani i

le galuega faafaiaoga, ina ia faigofie ona malamalama fanau i lesa ua tapenaina.

E iva vaiaso sa faia ai aoga, e amata mai le aso Gafua se ia o'o i le aso Faraile. E amata i le 8.30 i le taeao ona mae'a lea i le 11.00 i le aoauli. O le aso Gafua se ia oo i le aso Tofi e faatino ai lesa, a o le aso Faraile e fai ma aso taalo a le fanau. Sa faamanatuina foi le vaiaso o le Eseta, i galuega faatino eseese e pei o valivaliga fuamoa, *cards* ma le sueina o fuamoa sukalati (*Easter egg hunt*). E momoli atu ai le faamalo ma le faafetai i faletua uma sa gapatia i le aoaoina o fanau i lenei kuata ua faaiuina ma le manuia. Ia viia le Alii i lona alofa ma lona agalelei.

Faafetai lava, Tanya Lesa.

TAALOGA TAGĀ POLO 2015



O le Aso 8 Me, 2015 sa faataunuuina ai le taaloga tapolo i le va o Malua lea sa kapeteniina lava e le Alii Pule o le Kolisi, ia Afereti, ma le au fili mai Ausetalia i lalo o le faatautaiga a le Toeaina Faatonu ia Peleti Toailoa. O lenei fa'agatama o se faiga masani lava i tausaga taitasi e feiloai fiafia ai le aufaigaluega mai Ausetalia ma faiaoga ma a'oa'o mai le Kolisi Faa-Faifeau a le Ekalesia ae le'i amatalia le Fono Tele a le Ekalesia.

Ua lua tausaga sosoo o malolo faatamalii lava le au a le Kolisi (poo le tuai tapena poo le faaaloalo i le paia i faafeagaiga). Ae o le tausaga lenei sa maua lava le mafanafana o le Alii Pule ma faiaoga o le a i ai se suiga; ia ma leisi, o le ipu o le tauvaga o lenei tausaga sa tauaaoina lava e le Alii Pule ia Uili ona o le ipu tuai ua le mafai ona toe tuua ma eleele o Ausetalia. O le agaga maua lava, ia amata le ipu fou i Malua, ae peita'i, e ese foi le *game plan* a le susuga i le Toeaina ia Toailoa.

E ui lava la ina manumalo le au a le kapeteni ia Uili ma le aoao ia Evagelia (*net 70*), ae o le tuu faatasiga o au e pito i luga e 12, na maua ai e Malua le *total* 933, ae o Ausetalia e 924. Ma o lea la ua faasavili atu ai nei le ipu sei eva i Ausetalia mo se taimi le tumau. Faamalo i kapeteni o au e lua ma le mamalu o au taalo uma ona o loo tumau pea le agaga faatausala ma aga faatamalii e atagia ai pea mafutaga a le fanau a le Atua. Malua e oso pea le la.

(*Note:* O le taaloga foi lea na tauaalo aloaia mai ai le faamavaega a le susuga ia Kolia Kolia ona ua avea nei le susuga i le faafeagaiga ma se tasi o Tamā o le Ekalesia, e ala i le tofi Toeaina.

Manuia le fono.



Komiti o le Maluapapa

Aukilani Tui'ai, Visiesio Saga, Reupena Maulolo
Vaise Maiava, Leefu Pule
Malua Theological College
www.malua.edu.ws
© 2015